

JOE LAVEIST A BAY LAGA NOS

ORANJESTAD (AAN): A drenta e tristo noticia cu e conocido persona cu a elabora hopi aña na Lago Sport Park, Sr. Joe Laveist kende a haya e nomber di cariño Joe di Lago Sport Park, a fallece pasco.

Directiva di Aruba Sport Unie a duna merito na Sr. Josiah Laveist, cambiando nomber di San Nicolas Sport Park den Josiah "Joe" Laveist" pa su dedicacion y labor incansable den e stadion aki.

Josiah Valentine Laveist, pero den boca di su pueblo cual ta San Nicolas, y pa esunnan cu conoce su nomber ta "Joe".

"Joe" a nace na St. Maarten parti hulandes ariba 29 maart 1918 "Joe" a hanja su educacion basico na St. Maarten y despues na Sto. Domingo.

Durante aña 1936 pa 1937 "Joe" a bini Aruba, y a cuminsa traha pa Lago Oil Transport Co. Lmt den Dining Hall.

Na aña 1942 "Joe" a contrae matrimonio cu Viola Anasta van Putten, di cual matrimonio a nace 6 jui.

Na aña 1946 "Joe" a cuminsa traha den Lago Sport Park como Maintenance den servicio di Lago, e tempo ey ainda Lago tabata doño di Lago Sport Park, "Joe" tabata e motor tras di tur preparacion pa actividadnan deportivo y social den Lago Sport Park.

Pa weganen di Aña di La Reina Lago tabata manda un baki grandi cu nan ta jama Rosa Carrier den cual tabatin tur sorto di material pa preparacion di e weganen.

Tambe "Joe" tabata prepara e.o. tereno pa A.S.U. week pa weganen internacional, lugar pa train boxeo pa e conocido Sugar Boy Nando, Fenton.

"Joe" tambe tabata un

figura popular den deporte.

E deportenan cu ela practica mas tabata Cricket un deporte masha in e tempo ey, tambe ela practica Baseball A.A.

E tabata hungador di Nesbitt's Aruba Dodgers y Antaco.

"Joe" a cumpli 25 aña den servicio di Lago trahando na Lago Sport Park, pa e ocasion aki ela wordo honra cu un holoshi di oro como aprecio pa su gran labor y dedicacion.

Na e mesun aña 1968 cu Lago a pasa Lago Sport Park pa A.S.U. "Joe" a drenta servicio di A.S.U. y a sigui cu su trabaoonan.

Despues cu Lago a sera su portanan Lago Sport Park, a cambia di nomber pa San Nicolas Sport Park.

"Joe" a traha en total mas cu 50 aña den San Nicolas Sport Park.

Na aña 1991 "Joe" a ricibi condecoracion Real "Ridder in de Orde van Oranje Nassau" for di man di Gobernador Felipe B. Tromp (q.e.p.d.).

"Joe" lo a cumpli e aña aki 27 aña den servicio di A.S.U.

Directiva di A.S.U. y "Joe" su coleganan, cu gran satisfacion a dedica e diadomingo aki luna di september na "Joe" un persona simpatico y cu semper a cumpli cu su responsabilidad, e dia aki tabata presente varios invitadonan, presidente Cesar Kip, entre otro Ministro Watty Vos, miembro di parlamento Willem Vrolijk, y su coleganan di Aruba Sport Unie.

"Joe" a cumpli awor ta toca na nos pa duna e balor cu e merece.

Na famia Viola, jiunan nos mas sincera condolencia y cu Joe sosega na paz.

Entierro di "Joe" Laveist lo ser anuncia despues.

